



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

Instagram tiryimym@aolima

YouTube tir yimym

TAPAK 8

Israel mesura Hamas-i Gaza nung yimsu asutsu US-i memolunger: Blinken

ODI rankings: Shubman Gill No. 1 asayar kumogo

VOL. XXI NO. 32 (ADOK 32) DIMAPUR YANGTEPNÜ (THURSDAY) YIMPOKSÜI (NOVEMBER) 09, 2023 ₹ 5.00



Minister of State for Education, Government of India, Annpurna Devi-i Nagaland semdangba mapang November 8, 2023 nu Raj Bhavan, Kohima nung Nagaland Angh La Ganesan den ajurutepa liasü.

DMK lenir Bharathi-i 'azushi achir' ajaba atema BJP Nagaland mepelar

Kohima, Yimpoksüi/Nov. 08 (TYO): DMK lenir RS Bharathi-i Naga nunger ya azushi achirtem ta ajaba asoshi BJP Nagaland state unit-i aitsüogo.

Kohima nung aliba BJP Nagaland office nungi osangbener tem den jembidang tatong tir Kropol Vitsu aser odongtar Thomas Magh nati ashiba agi, taoba mapang Rajya Sabha zungsem aser Dravida Munnetra Kazhagam (DMK) indang Organizing Secretary, RS Bharathi-i Naga nunger ya azushir achir ta anema jembibi.

Taoba DMK lenir M. Karunanidhi sor kum 100 ajungba bilemteta DMK ajanga sentong ka ayongzükba nung jembidang pai iba olen ya jembisema liasü.

"Tamil Nadu Angh RN Ravi aija jembidang Bharathi-i Naga nunger anema jembibi aser pai Naga nunger ayakji "azu achir" (Dog eaters) ta ashiba ajanga Naga nunger jashidaksü," ta Kropol-i ashi.

Kin ka shiluji achi-ajemba yimyatem agi mejangatsür aser achi-ajemba yimya nung ajemdaker Naga nunger ayak mezungmeshitsü shinga daka tashi mali, ta BJP Nagaland ajanga DMK lenir dang ashi.

"Ibai danga kecha masü saka Naga nunger kin anema jembibi lir aser ozüing agi melaba ama Bharathi memerenshi tashi BJP Nagaland ajem-ajema malitsü," ta pai ashi.

Akhi mapang nungi azü shi amshia tamangba yimsü balala külemkeja aruba Naga nunger sobaliba lir aser itemji tanüa yimtsüing sungkum nunga angur, ta Vitsu-i rateta ashi.

Anungji Bharathi-i Naga nunger ya azushi achirtem ta ajaba ya fundamental rights anema lir aser Naga nunger tamangba yimsü temeden anema jembibi lir, ta ashi.

Tamil Nadu Angh RN Ravi-i Naga nunger bhukuma 'Naga nunger ya tasü tait, ochishir aser

meranga inyakba nisungtem lir,' ta ashiba atema pela agizüker, saka DMK lenir Bharathi-i yimjak nung Naga nunger azushi achirtem dang mezungmeshiba ya tiazü otsü prokshiba maparen ka lir aser khenyongi magizükteter, ta Vitsu-i ashi.

DMK dang par Angh den mangatetep ken o kar alitsü südi, taka Bharathi-i Naga nunger tenüing amshia aser ajia mezungmeshia jembiba ya süngmanger, ta pai ashi.

"Naga nunger ya tashi mait aser mela-mela mesüzüktetba nisung aser parnokbo mejashitsü ta pai bilem asü? Bharathi-i meshisadangi jembiba o ya ajaki aitsütsüla aser mamatettsü," ta BJP Nagaland state unit tatong tir Vitsu-i ashi.

Pai memetetba kin ka anema o tamajung jembiba kanga süngmanga bilemer, ta ashi.

"Naga nungertem pei sasep nung nokinketer lir aser tensa majungdang teti külemi nokdaksü. Onok sobaliba tajung indang alimai meteta lir aser Union of India kübok dangar dang nungi balaka lir aser ibaji Bharathi ama tamachi nisungtemi kodanga mesamatsüettsü," ta pai ashi.

Bharathi-i ano Naga nunger temolung yirusütsüsa jembiba masü saka Naga nunger tenüing asangba lir ta ashiba ajanga zübu nung metsü tali inoktsüba ama lir, ta Vitsu-i ashi.

"Pa sasa pa kumzüksü akok tashi merandangogo, ajisiüaka Naga nunger aser Northeast nung aliba nübür ajanga indang yimsü aser sobaliba mezungmeshiba sülen pa dang kecha mashi metoktsütsü," ta pai ashi.

Maneni Vitsu-i Nagaland nung aliba Congress danga Bharathi-i jembiba nung par tangatetba tejangja nübürtem nem metetdaksütsü ashi. Congress aser DMK ya centre nung opposition telok temi tentetba INDIA bloc nung zungsem lir.

Arunachal Pradesh Angh-i AR (Mahila) passing out parade semdang

Dimapur, Yimpoksüi/Nov. 08 (TYO): Mahila Recruits tasen 382-i Shokhuvi nung aliba Assam Rifles Centre and School nung November 8, 2023 nü kanga junga tsüngkang metema jaja liasü.

Iba sentong ya special attestation parade ka liasü aser ibai tongpang nung raratsü, noknü amshiyim, jungle lane shooting aser counter insurgency operations nung takotet küma hopta 44 tashi training tesashi agiba tembanga ayongzükba sentong liasü. Iba attestation parade nungya Mahila Recruits dang liasü aser parade ya ARTC & S nung officer tetsür, Maj Swati Basedia-i anir ali.

Iba attestation parade nungya Arunachal Pradesh Angh Lieutenant General Kaiwalya Trivikram Parnaik, Param Vishisht Seva Medal, Uttam Yudh Seva Medal, Yudh Seva Medal (Retd); Lieutenant General

Pradeep Chandran Nair, Param Vishisht Seva Medal, Ati Vishisht Seva Medal, Yudh Seva Medal, PhD, Director General of Assam Rifles aser Indian Army aser Assam Rifles nungi tanishirtem dena liasü.

Sepai tasen tetsürtem den jembidang, linük nung Assam Rifles ya paramilitary force tejentiba lir aser shilem aika agir, ta Reviewing Officer-i ashi.

Assam Rifles ajanga 2015 küm nungi tenzüka frontline duties ajak nung Riflewomen anioka lir. Tasü tait Riflewomen temi parnok sempet aser tashi ya North East nung kisüing masü saka J&K aser UN Missions nunga sayuogo, ta AP Angh-i ashi.

Assam Rifles indang tetsür contingents temi 2019 aser 2023 Republic Day Parades nung par sempet sayua liasü. Frontline duty nung parnok aliba ajanga item tesem nung aliba tetsür aser

tanurtem molungjang nung anisüngzük aitdaksüba dang masü saka women empowerment tsütsü tejakleni aoba sayur, ta pai ashi.

Tatem nung pai zungsem tasentem aser tejak tenteta aliba parnok tsürabur nem tenüingsang agütsü aser tarutsü wadang nung takokba lidakjang ta moatsü.

Arunachal Pradesh Angh-i iba anogo Asür Captain Kenguruse, Mahavir Chakra bilemteta liasü. Pai Assam Rifles zungsem tasentem (tetsürtem) dang bendanga agütsür linük tenzüksü ajungshi aser technology den lirumedema alitsü ayongzük.

Passing out parade sülen Angh-i overall best Recruit Riflewoman Nonie Chizo, best Recruit in physicals Riflewoman Veplilu Hoshi aser very capable Recruit of Changlang Dist of Arunachal Pradesh Riflewoman Lushangi Yobin nunger den ajurutepa liasü.

Dimapur nung lokti tentet masemer, district administration kechi ajir: CPO & WSH

Dimapur, Yimpoksüi/Nov. 08 (TYO): Dimapur Railway station nung tawa agency kari rakzükraktemtsü merangba asoshi süoki ia bilemer, ta Chakroma Public Organisation (CPO) aser Western Sumi Hobo (WSH) sangdong ka ajanga ashi.

Iba ama mapa tamajung inyakba onoki khukhua aitsür aser iba mapa inyakba agency ya yimjak nung metetdaksütsü akhanger, ta ashi.

Jangra aliba telok aser kija den lungjemmer NPGs tem densema 'syndicate system' aser tashiyim amshia senotsü meshiba dak masü saka talisa state indang shishilempadak tiyongtsü, Dimapur district nung unions, associations, state agencies

zünger mezungami aliba atema aoksar, ta WSH tir Shikaho Zhimomi aser CPO tir Zhatou Kimho nati sangdong ajanga ashi.

Item lokti tentet ajanga tebilemttsü khuret agütsüba ajanga nübürtem aser shishilempartem timtem nung yutsür.

Item nungdak maliba lokti tentet ya komasür register süa tenokdangba kecha makai pei molung inyaksü melar ta district administration dang onoki asüngdang, ta ashi.

Nübürtem ajungtsü mesüra ayak mesamadaksütsü tenüing nung item lokti tentet ya district administration-i ngua timba akumer aser anogoshi amai senotsü saruaka tajangzük mapa

inyakba balaka majiteter, ta sangdong ajanga ashi.

Iba tensa nung ajemdaker CPO aser WSH ajanga district administration dang item lokti tentet dak tasü ita tapet mera agütsü akhanger. State nung tensa tajungba kumdaksütsü mechi tekeratiba nung jana ama aliba lokti tentet nokdangtsü lenmang bushitsü ajungshir, ta sangdong ajanga ashi.

GB unions, Chairmen Federation, Ward aser Colony councils ama 'grassroots organisations' dang yakyaka mera agia pei aliba tesem nung item tebilemttsü samatsütsü aser kibur ama alitsü ajungshir, ta CPO aser WSH sangdong ajangasa ashi.

43 Tapi AC bye-election indang post poll scrutiny agiogo



General Observer MG Rajamanickam IAS, Returning Officer of 43 Tapi AC Rongsenmenla SDO (C) aser ARO Tshelhi - u EAC nunger den candidate tem indang teshimtet nisungtem lia November 8, 2023 nu 43 Tapi Assembly Constituency nung bye-election agiba indang post poll scrutiny mapareninyakba noksa angur.

Dimapur, Yimpoksüi/Nov. 08 (TYO): 43 Tapi Assembly Constituency nung bye-election agiba indang post poll scrutiny maparen General Observer MG Rajamanickam IAS, Returning Officer of 43 Tapi AC Rongsenmenla SDO (C) aser ARO Tshelhi - u EAC nunger den candidate tem indang teshimtet

nisungtem lia November 8, 2023 nü Returning Officer indang chamber nung inyaka liasü.

Parnoki Form 17A aser danga kulizüing kakat tem reprangshia Election Commission of India-i shia aliba ama election ya shidak aser yimjung nung agi asü masü ta asadanga liasü. Returning

Officer dang la tsütsü nungi ashishitep mesüra timtem kecha liasü-meliasü ta asüngdang aser lai election kanga junga agitetogo ta langzü.

Political candidates indang agents tem nungi ashishitep kecha maruba sülen party ajak den molungtepa RO-i scrutiny inyakyim shibanga liasü.

SHG züngsemtemi Water Treatment Plants (WTP) Jotsoma semdang



November 8 nü Water Treatment Plants (WTP) Jotsoma semdangba mapang SHG züngsemtem den DUDA Joint Director Kezhocole Rhetso tangokba noksa nung angur.

Kohima, Yimpoksüi/ November 8 (TYO): Tetsür SHG züngsemtem nem tzu dak sendakba inyakym balala dak sendakba nung parnok shilem aser khuret angatetdaksütsü asoshi Atal Mission for Urban Transformation (AMRUT), National Urban Livelihood Mission (NULM) aser Public Health Engineering Department (PHED) longjemer November 8 nü Water Treatment Plants (WTP) Jotsoma semdanga liasü.

Junior Engineer PHED Kohima Urban, Medozeu Chatsu-i sentong nung shilem agirtem iba tesemi anir ao aser water treatment process indang tangazükba agüja liasü.

State Mission Director DAY-NULM, State Urban Development Agency, Directorate of Urban

Development, Kihohli Kinimi-i ashiba agi, DAY-NULM kübok Kohima District kübok SHGs 22 nungi züngsem 32-i Jal Diwali - "Water for Women-Women for Water" nung shilem agidar, koba November 7 nü tzenük aser November 9 nü tashi agitsü.

Lai ashiba agi, AMRUT 2.0 kübok Ministry of Housing and Urban Affairs-i, "Jal Diwali" benjungtsü atema National Urban Livelihood Mission den longjemer "Women for Water, Water for Women Campaign" ta nungja agütsür November 7 nungi 9 tashi sentong ya ayongzüksü sentong yanglua liasü.

Laisa, Self-Help Groups (SHGs) tem nungi tetsürtem nem Water Treatment Plants (WTPs) tem semdangtsü asoshi maongka agütsüogo, ta ashi. Iba

plant semdangba ajanga parnok nem kibongtem nem tzu temerek agütsüba inyakymtem indang tangatetba ka agütsüogo. Maneni parnok nem tzu jenjang tendangba inyakym indang tangazükba agüja liasü, ta laisa shisem.

Iba plant semdangba nukjidong tongtibagtibaji tzu infrastructure ya parnok meyong ta tali angatetdaksütsü asoshi lir. Maneni iba tesem semdangba ajanga interview tem aser tanga inyakym balala nung shilem agitsü maongka agütsütsü," ta lai ashi.

DAY-NULM SHGs tem inyakym ya Razhu Point Kohima nung tzenük aser iba sülen Jotsoma PHED nung Water Treatment Plant semdang aser SHG züngsemtem den sensaksema sentong agia liasü.

Union Minister Annpurna Devi-i Tseminyu District semdang

Dimapur, Yimpoksüi/ November 8 (TYO): Union Minister of state for Education, Annpurna Devi-i, November 8 nü Tseminyu District semdanga, DC conference hall Tseminyu nung senden ka amen aser lokti tentet balala, NGO, GB, VCC, SHG tem, RengmaHoho aser Rengmaselo Zi nung den

sensaksema liasü. Rengmaselo Zi-i Minister nem tetushi agüja liasü.

Minister-isa, Tseminyu District kübok department balala tekolaktem den sensak asem. Sensaksema mapang department balalai Union Minister nem presentation agüja liasü. Maneni laisa, PHC,

Chunlikha aser GHS, Kandinu semdanga liasü.

Kasa mapang nung MLA & Chairman DPDB Tseminyu Jwenga Seb-i, Tseminyu District indang metetdakja liasü. Union Minister ya Advisor School Education Government of Nagaland Kekhrielhoi yhome-i meina liasü.

Dimapur DPDB senden Nov. 7 nü menogo

Dimapur, Yimpoksüi/ November 8 (TYO): Ita shia amenba Dimapur District Planning & Development Board (DPDB) senden November 7 nü Deputy Commissioner, Dimapur Conference Hall nung menogo.

Iba senden ya Advisor, Labour, Employment & Skill Development, Excise aser DPDB, Dimapur mendenbuba Moatoshi Longkumer lenisüba nung agia liasü.

Senden nung Longkumer-i DPDB tenung nung Dimapur Deputy Commissioner tasenba Dr. Tinojongshi Chang, NCS pelashishia agizüka liasü.

Senden nung Chang-i züngsem ajak dang district lenla ajak nung terenlok asoshi District Administration den teka amteper inyakshangshitsü mepeshia liasü. Paisa, NSDMA-i ayongzükka November 3 nü Mock drill agiba kanga takok ngua agitetba atema ken o dak sendaka aliba department tem dang kanga pelaba lemsatap.

Chang-isa, Dimapur nung tzmetsüng agi kangshiba indang

tebilemtsü lepa reprangshi aser iba tebilemtsü bentetsü asoshi jenjang balala agiba indang metetdakja liasü. Paisa, ketdantsürtemi survey ka agiba sülen sorkar ali atsünga alirtem nem Show cause notices agütsüogo, ta Board nem metetdaksü.

Kasa mapang nung Longkumer-i, tang tashi nung jenjang balala takok ngua agir aliba atema pelaba lemsatap aser asükwa itatem metembang tsüngda inyakym balala tembanga inyaktsü temulung lema bilemba lemsatapa liasü.

Senden nungsa Chief Medical Officer (CMO)-i, Dimapur nung Dengue tashidak pokteter aliba indang metetdaksü aser iba tashidak den raratsü asoshi nungdaka aliba tongtibang machine tem alizükba aser tonga aruba indang osang agütsü. Laisa, azü tenla agütsüba aser azü tenla agütsüba camp ka ayongzükba atema DPDB züngsemtem dang kanga pelaba lemsatap.

Maneni DMC Administrator-i, Dimapur yimti nung CCTVs amenokba indang metetdakja

liasü. Borad-isa, yimti tebor tajungba kümdaksütsü asoshi mamshiba cable aser yinzütem agitsü asoshi sensaksema liasü.

Ano board-i, LADP 2023-2024 atema Verification Committee tentetba agizük aser S. Apostolic Mission Residential School, Zakiesato Colony, Dimapur atema Grant-in-Aid asoshi benokba ya ken o dak sendaka aliba ketdangsurtem dangi abentsü mulungtepa liasü. Board-i, institute nem NOC agütsütsü atema benoka aliba Department of Higher Education dangi abentsü telemtetba agi.

Senden nung Board-i, Linguistic Minority Forum of Nagaland, Midland, Dimapur, Dimapur Motor Sports Club (DMSC), Thaheku Village, Eco Warriors Nagaland, Duncan Bosti aser Nagaland School Alliance, Kevijau colony amala lokti tentettem züngoksemsü atema sorkar dangi abentsü telemtetba agia liasü.

Iba senden nung department balala nungi sorkar ketdangsurtemi shilem agia liasü.

Clark Theological College nung Ao oshi agi tenzükogo

Mokokchung, November/ Yimpoksüi 08 (TYO): Clark Theological College (CTC) nung tanu November 7 nü nungi Ao oshi agi tenzükogo.

Ao Riju-i Clark Theological College nung Ao oshi agi tenzükba ya Ao oshi oben renloka aotsü asoshi aser talisa laishirtemi tetsü oshi tali terajemba nung angateta Tsüngrem osang tajung sangdongba nung shilem agitsü asoshi lirta Ao Riju M e n d e n b u b a Rev.Prof.Rongsen Longkumer ajanga metetdaksü.

CTC nung iba Ao oshi ya BD Final year Semester 2 pur nungi agia tenzükogo. Clark Theological College nung Ao oshi agirtem ajungshia Ao oshi agir rongnungi shibai tematiba jenjang nung takok ngutetdir Ao oshi renloka odaktsütsü tangatetba nung tentetba foundation "Jemtimenba Mollier Foundation"(JMF) ajanga kümren ka nung tematiba jenjang tongteter nem tetushi sempet agutsütsüta JMF tenung nung JMF Tezulur Wb. I.Temjen Tzudir-i iba class agiba mapang metetdakja liasü.

Kohima Police-i metetdaksür

Dimapur, Yimpoksüi/ November 8 (TYO): Kohima Police PRO Nagaland Legislative Assembly Election 2023 atema mapa balala asoshi S.P

Office, Kohima-i mekazükba gari kibur/driver tem dang parnok gari hire asüba taah November 9 nü10:00 ako nungi tzenüka S.P Office, Kohima nung agütsütsü ta metetdaksüogo.

Mejangjaba tasü mang ka nguteta lir

Dimapur, Yimpoksüi/ November 8 (TYO): November 6 nü nikongtsütsü 4 ako shi nung telephone ajanga Chumoukedima P.S. nem Tenyiphe-II nung arishi küm 30 nungi 35 tsüngda asütsü ta bilemba tetsür (non-local) tasü mang ka nguteta aliba osang agüja liasü. Tetsür la ya kari tepset asütsü ta temulung meleme bilemer.

Osang angazükba sülen PS duty party iba tesemi ao aser tetsür la ya kodaser asü iba indang bushisüngdanga liasü. Executive magistrate matsüngdang FSL team-i tasü mang ya asadangogo. Temzüng ozüng kübok tinyaktsü maparen ajak

tembanga inyakba sülen tasü mang ya post-mortem examination aser maitsü jangjatsü atema District Hospital morgue-i bener ogo. Asüla yagi faded blue strip half pant, green aser pink strip shawl, teberem aser tetsüng nung külemküja dak sendakba angüsü mesür liasü, teka tabelen rubber band tanak ka inoka liasü aser la indang temezüng nung dark pink nail polish nüloka liasü.

Iba dak sendakba nung asür kinunger aser medemertem dang Officer-in-Charge, Women Police Station, Dimapur (Mobile No. 7085055027) den tongteprateptsü mepeshia metetdaksüogo.

Kohima Law College nung Advent Christmas sentong agi

Dimapur, Yimpoksüi/ November 8 (TYO): University law semester tatidang November 16 nü nungi tzenüktsü lia working day tatembangbuba anogo Kohima law College nung November 8 nü college nung Advent Christmas sentong tatsüka agiogo.

Christmas osang lemsatapba mapang Asst. Professor Kezhokhoto Savi-i, kaketshirtem dang taruba Christmas amungtsü atema tanaben asoba Khrista dak amanger kaka akümtsü ajungshi, kechiyong kotai aitsü atema Yisu-i asenok tanaben asoba Khrista dak amanger kaka akümtsü teti ajar, ta ashi. Yisu alima aruba nukjidongji temenenpurtem nem tekümtet agütsütsü asoshi liasü, ta paisa ashi.

Paisa, Mark 2:7 aser Roman 3:23 dak ajemdaker, asenoki temenen menaba

ajanga Yisu ya aso aser Khrista dak amanger ka ama Yisu Khrista tesayuba tamendakdakji tanaben soshitsüa lir. Yisu yakta arutsü ajungji asenok ajak tanaben asoba Khrista dak amanger kaka kümdi ta paisa ayongzük.

Yohan kaket nung nisung ka tenung agi Nicodemus telanzüba bushia aonung Yisu dangi aruba indang jembiba mapang, Yisu-i pa dang tanaben mesora kota yimli mongutetsü ta ashiba dak ajemdaker tamangba yimsü, jenjang aser yimya yimpong agi nisung ka meküzmüktetsü ta tangatetba agütsü. Maneni pai Laishiba tapu balala nungi sentepa aliba lokti ayongzükka liasü.

Iba sentong nungsa College Sports Week 2023 mapang takok angurtem nem college principal-i sempet agüja liasü. Sentong ya lokti sarasadem ka agiba sülen tembanga liasü.



November 08, 2023 nù Raj Bhavan, Dehradun nung linük Tir, Droupadi Murmu-i Uttarakhand Angh, Lt General Gurmit Singh aser Chief Minister Pushkar Singh Dhami na ajurudang tangokba noksa nung angur.

Asükwa mongpu Parliament December ita nung ang tenzüksü

New Delhi, Yimpoksüi/ November 08 (Agencies): Asükwa mongpu Parliament teti agia Novemeber ita nung tenzüker, ajisüaka takumbo iba senden December ita tanabuba hopta nung ang tenzüksü aser Khristmas atongtsü lia tembangtsü.

State pongu nung assembly election agiba votes December 3 nù azüingba sülen kobi melii Parliament senden tenzüksü, ta Bodhbarnü osang ka ajanga metetdaksü.

Taruba senden nung tongtibang bill tem rongnung IPC, CrPC aser Evidence Act atema jembitsüa akok, kechiyong tawa Parliamentary standing committee on Home-i report asemji renemogo.

Teti agia asükwa mongpu senden ya November ita tasembuba hopta nung tenzüker aser December 25 matongdangsa tembanger.

Taruba senden nungjisa chief election commissioner aser election commissioners shimba

inyakyim dak sendakba bill atema jembitsü. Iba bill ya taküm tzüngluruwa mongpu Parliament senden nung benoka liasü saka opposition aser taoba chief election commissioner temi ashishiba ajanga magizükteti liasü.

Iba bill ajanga CEC aser ECs mendenji cabinet secretary jenjang den kasa züngshitsü benoka lir. Tang CEC aser ECs ya Supreme Court judges den kasa jenjang nung züngshir.

Rongsenketzung temaba linük 3buba ji India kümdaktsütsü: PM Modi

Bhopal, November 08 (Agencies): Bodhbarnü Madhya Pradesh kübok Damoh jila nung election nüboyim lokti senden ka nung jembidang Ato kilonser, Narendra Modi-i, pa kümsük (term) tasembuba Ato kilonser inyakba mapang nung India linük ya alima nung rongsenketzung tulutiba linüktem rongnung jenjang tasembuba kümdaktsütsü, ta metetdaksü.

Madhya Pradesh nung assembly elections November 17 nü agitsü, aser iba election atema nüboyimba mapang Modi-i, sorkari maneni ochimashi anema raratsü ta nanzük.

Modi-i, Chhattisgarh aser Rajasthan na nung nüburtemi Congress sorkar shimyonga chief minister temi ochimashi mapatem inyaker, ta aitsü.

Ato kilonseri, 2014 küm nungi tenzüka India nunger rongsenketzung jenjang 10buba nung aliba tangbo jenjang 5buba

nung lir; akhidang küm 200 dak tema India yimsü süa aliba United Kingdom indang rongsenketzung jenjang-a India-i ajangetogo, ta ashi.

"2014 küm onoki sorkar akümba mapang nung linük rongsenketzung jenjang 10buba nung ang liasü. Tanem-tanemi jenjang 9buba, 8buba, 7buba aser 6buba aküm, ajisüaka shingaiya iba atema mejembi. India-i jenjang 5buba tonga akhidang küm 200 tashi asen linük yimsü süa aliba UK ajangetdangbo ajaki süngmanga India dak rangloker," ta pai ashi.

Modi-i, pa kümsük tasembuba Ato kilonser inyakdangbo linük rongenketzung ya alima nung jenjang 3buba akümtsü, ta nanzük.

Sangküm Lok Sabha election agitsü lia Modi-i iba o ya jembir.

Paisa, Congress-i sorkar kümra taoba mapang iba party

nungi Ato kilonser kati jembiba ama parnoki state tem nung shilem 85 commission agiba mapatong tenzüksü, ta metetdaksü.

Taoba mapang Ato kilonser, Rajiv Gandhi-i, Centre nungi yokba sen 1 shia poisa 15 agi dang tajangzük angutsüpurtem ket atonger, ta jembia liasü.

Modi-isa, Centre sorkari sensakertem atema angati ration agütsüba scheme ano küm pongu atsülangtsü ta nangzükba anema Election Commission nem ken o agütsütsü, ta Congress lenirtemi ashir, ta metetdaksü.

"Parnok nem iba temenen mapaji inyakdakjang, saka nibo maneni nüburtem atema mapa tajung inyaksü," ta pai metetdaksü.

Ato kilonserisa, pai maneni ochimashi anema raratsü, ta shia lokti dang, nenoki yamaji inyakdaksüner asü meinyakdaksüner?, ta asüngdanga liasü.



Patna, November 08, 2023: Bihar Chief Minister, Nitish Kumar-i Assembly nung jembidang, nütsüng arenba azüoktsü atema tetsürtemi shisaliok nungdaker, ta jembiba anema BJP MLA temi State Assembly kima longkak aitba noksa nung angur.

Celebrating 35 Years of Glorious Service

LIVINGSTONE FOUNDATION INTERNATIONAL
THAHEKHU / KEVIDAU, DIMAPUR - 797112 NAGALAND

2024 ADMISSION OPEN NOW
PREP-I TO GRADE-IX

ENROL NOW

WHEN YOUR CHILD'S FOUNDATION IS STRONG, THEY ARE PREPARED TO FACE THE WORLD

- Forms available between 9:00am and 2:00pm at the LFI Accounts Section.
- In commemoration of 35 Years of the school a complimentary concession of 35% for all NEW COMERS in Admission, School & Hostel fees will be provided for Prep-I to Grade-IX.
- 25% Concession in both Hostel & School Fees will also be granted to students with excellent flair in Sports, Art, Music & other such skills.

"WE BELIEVE IN ALL ROUND & HOLISTIC DEVELOPMENT OF A CHILD"

LIMITED SEATS AVAILABLE

JOIN US ON SOCIAL MEDIA
 livingstone.nagaland@gmail.com
 livingstonenagaland.com
 livingstonenagaland

CONNECT WITH US
 03862-244203/244302
 +917005996092 / 93

CBI-i TMC MP, Mahua Moitra anema bushisüngdangtsü: BJP MP

New Delhi, Nov. 08 (Agencies): Bodhbarnü BJP MP, Nishikant Dubey-i, Lokpal-i CBI dang Trinamool Congress MP, Mahua Moitra anema bushisüngdanggang ta tuyuogo, ta metetdaksü.

Ibaji langzüa Trinamool MP, Moitra-i, CBI-i bushisüngdangtsü süra ni pelaa agizüker, ajisüaka CBI-i sen crore 13,000 dak sendakba Adani coal ochimashi anema ken o tama benoktsüla, ta ashi.

BJP lenir Nishikant Dubey-i X ajanga, "Ni benokba ken o dak sendakba nung tanü Lokpal-i linük security tashi maittsüsa ochimashi inyakba atema Mahua Moitra anema bushisüngdangtsü asoshi CBI dang tuyuogo," ta metetdaksü.

Ajisüaka tang tashi nungbo iba indang official sangdong mali.

Dubey-i X ajanga iba osang metetdaksüba sülen mapang tatsüka tsüngda Mahua Moitra-

ia X ajanga, "CBI-i sen crore 13,000 indang Adani coal ochimashi anema mezüng FIR benoktsüla. Linük security tebilemtsü onükji FPI meyong (inc Chinese & UAE) Adani company temi @HMOIndia clearance ajanga Indian ports & airports alizükba ya lir. Yamaji süra ni anema bushisüngdangtsü atema ni CBI pelaa agizüker," ta metetdaksü.

Nishikant Dubey-i, businessman Darshan Hiranandani nungi tajangzük agia Mahua Moitra-i Lok Sabha senden nung Adani Group aser Ato kilonser, Narendra Modi anema tasüngdangba kaogo, ta la nem tai tonglokja lir.

Mahua Moitra-ibo lai aibelena mali; iba ya ruling BJP-i yimtenren tsütsülen nungi la anema mangyangba lir, ta shiogo.

Tang iba ken o ya Lok Sabha Ethics Committee-i reprangdar.

US nungi Anthony Blinken aser Lloyd Austin nati India semdangtsü

New Delhi, November 08 (Agencies): Tan hopta US Secretary of State, Antony Blinken aser Defense Secretary, Lloyd Austin nati India semdanga External Affairs Minister, Subrahmanyam Jaishankar aser defence minister, Rajnath Singh na den senden amentsü.

Hokolbarnü Delhi nung "2+2 Dialogue" senden nungji tang Gaza Strip aser Ukraine na nung rara atema mejembitsü saka Indo-Pacific nung security tsütsü tebilemtsü onüktem atema jembitsü, ta ketdangsertemi metetdaksü. Indo-Pacific region nung defence tsütsü amalitepa inyaksü aser mapatong balala atema 2018 küm "2+2 Dialogue" tenzüka liasü.

Canada nung Khalistani lenir ka tepsetba ken o nungi Canada aser India na tesendaktep kanga mejungi kumgo, ajisüaka iba senden nungji iba onük süoka mejembitsü.

US ketdangsertemi India den tesendaktep ano tajungba yangluner aser parnoki taküm June ita nung Canada nung

Khalistani lenir ka tepsetba ken o bushisüngdangba nunga yaritsü ta nangzükogo.

Iba senden nung Indo-Pacific region nung China-i ambangyima inyakba atema tongti süa jembitsü, ta India nunger ketdangser kati metetdaksü.

India aser US nati India nunger raraba tayimtsü gol aser MQ-9 predator drones yanglutsü asoshi US-i supply asütsü atema tezüngzüktep agitsü asoshi jembidar.

Taküm June ita nung Ato kilonser, Narendra Modi-i Washington semdanga liasü aser taküm September ita nung US Tir Joe Biden-i New Delhi semdanga G20 senden agiba mapang nunga lenir anati linük ana tsüngda lenla balala nung tesendaktep atema jembio.

Tan ita tatembanglen San Francisco nung Asia-Pacific Economic Cooperation senden aliba mapang Joe Biden-i China Tir, Xi Jinping ajurua jurila senden ka amentsü sentong lir aser sangküm January ita nung Biden-i India semdangtsü.



TIR YIMYIM YIMOBILEM (EDITORIAL)

DIMAPUR YANGTEPNÜ, YIMPOKSÜI (YIMPOKSÜI) 09, 2023

Azü shi achirtem !

Naga nungertem ya azü shi achirtem ta India nung yimsüsürtemi luja jembiba mapang - mapang shia angashir aser ano tanga Tamil Nadu nung Dravida Munnetra Kazhagam (DMK) yimten telok lenir kati Naga nung azü shi achir kin ta luja jembiba manganüi Tamil Nadu angh R.N.Ravi aser Nagaland angh La Ganesan nati aija metetdaksüba angashiogo. Atangji, Naga nung luja jembiba Nagaland state BJP telok dak alaka Naga nung lokti tentet shingaia DMK leniri ashiba o ji langzüka mali. Atangji, azü shi achir kin ta luja jembibaji tanganütsübo maket saka Naga nungertem ola madok dang Naga nung masüba angh (governor) anatiang manganüi DMK lenir aija metetdaksüba kuliji temetnüsüka kümogo. Küm ishika jakdang Ravi ya Nagaland angh liasü saka NSCN-IM aser Naga nung lokti tentet kar den meputepi akümba agi, kechikomakaser, pa ya Nagaland nungi Tamil Nadui yok. Ano, pa asoshi tia majung kaji Tamil Nadu nunga yangji yimsü tesüdak DMK telok o Ravi na meputepi aküm, anungji yimten maparen nung Tamil Nadu government tetsüdak aluba agi, DMK leniri pa luja jembiba mapang 'azü shi achir Naga nungertem aridokba nisung' ta shisemba tsütsü iba ken o ya ano tali temai adoka bolutsüsa akümba liasü. Atangji, Ravi-i Naga nung luja jembiba manganüi ola adokbaji junger aser Naga nungertem pa dang pelatsüla, ajisüaka Naga nung azü shi achirtem ta ashiba kisung agi pa ola adoktsüsa akümba masü saka Nagaland nungi pa aridok ta jembibajang pa asoshibo tamajungba, anungji aji manganüi DKM lenir o ji meyiptsü südi. Atangji, alima nung kin aser tamangba yimsü shia achiajem yimya balala lir, kari achiba kari machir aser kari machiba kari achir, anungji awashi meteta aremzüktepa alitsüba alima tesem ajak nung kanga nungdaker. Aji oda, Hindu nungertem nashishi machir aser Muslim nungertem akshi machir saka Khristan-temibo ajak achir, anungji item telok balala rongnungji kati ka achiajemba sobaliba akümstübutepa lira, chiyongsü achiba len nungi meputep aser tsükchitep madoktsü. Naga nungertema tenungbo kin ka dang amai saka kin temeyoktep aika aser kin tila shia oshi dang masü saka achiajema balala, anungji Naga nungersa süaka azü shia kari achir saka karibo machir. Kasaji Naga kin karibo per achir saka karibo machir, ano karibo küpra achir saka karibo machir. Ajisüaka, iba jagi azü shi achir kin, per achir kin aser küpra achir kin ta lutsüteptsü kecha nungdak madoker. Aji oda, Ao kin asoshi azü ya yim anüker, shi arür aser tekülemba maparen nung amshia aruba kiset shiruru liasü. Iba dakji alaka tsüraburi azü shi achiba otsübo mangashi. Ajisüaka, tanübo Ao kin ya azü shi machiba kin ta meshitet, kechiyong kari machiyonga aikati achir. Ano, tangar Naga kin kar asoshibo shi ajak dang tajungtiba aser tashi tulutiba agütsüba azü shi ya lir, iba jagi jenjang tasak aser shishilembadak azü shi ayokba asenoki angutsü. Atangji, shiruru rongnung nisung asoshi tembar aser teyarir tajungtibaji azü ya lir, iba jagi azübo pei kibur kodanga mesendoki meimer. Iba ama shiruru ka tepseta achitsüba, atangji, temulung ashitsüka lir, iba jagi tangari menütsür aser sempar südi. Ajisüaka, asenok Naga nungeri azü shi machir ta meshitet, kechiyong tangbo asenoki odia shishilemdak azü shi seret oa alir, anungji hau achir ta ashitsüba dak alaka kecha manganütsü mali. Iba asenoki tsümar roti takong achiba menütsüba amai dang lir. Menütsüba majung saka machir masüji aremzüksüla aser tangari asenok achiajem yimya dena menütsütsüsa asenok malitsü merangtsüba tongtibang asütsü. Atangji, alima nung pei chiajemnüsü chia ajemtsü, ajisüaka asenoki kong, kodang aser koma chia ajemtsü itemji awashi meteta chia jemra, tangari menütsütsü melen akhümstübutepa. Tangbo Tamil Nadu nungba dangji "hau, onoki azü shi achir saka ano aikati temeima kanga meima anepalur," ta ashitsüba dak alaka kecha melika !

OLEMSABANG

Ao Naga Tenem nung Baptist arogo Tenzükba

~ Rev. Temsü Imchen, Asso. Professor,
Discipleship Bible College, Dimapur

(Yashi adok nung...)

1892 Molungkimong Baptist arogo tenzükdangji Molungyimsen Baptist arogo nungi aser Yajang Baptist arogo nungi baptiba member transfer asüba zülua angutsü. Ano Sibsagar nungi nisung 9 baptiba membortem Molungkimong arogo transfer asü. Anungji tangbo baptiba züngsemji $9 + 15 = 24$ liasü. Saka Molungyimsen akümdang baptiba member Molungkimong nungi transfer asüba kuli kecha mali, kechiaser Dr. Clark den parnok ajak yim tasen jagi ai ta otsü nungji angateter.

Molungkimong arogo otsü asoshi item amaji peria nguteta mali. Ya ajiang:

"The year closing with December, 1892, present no startling facts. One new church has been formed. It was in the village where the first baptism was performed in the Naga Hills. It was because the Christians were persecuted so much in this Deka Haimong village that they were induced to form a new village Molung. But the chief persecutors have died, several Christians have gone from other villages. These were formed into a church, and three were baptized, two of the three being chief man of the village.

Kechiaser missionary-temi Molungkimong nung Yisu yimsü atema inyakba tezülubatemji mangur. Ashiko tarutsü (future) nung arogo anaprongla asoshi maneni kulitem aser interpretation tasen nguteta lemsateptsü lenmangbo alitsü südi.

Molungkimong arogo otsü tamendakdak ka lir: ibaji tetsü tebou mapang nungi tebang o (oral traditions) agi belena jembiba arubatem alitsü akok. Mezüng tamangertem azüngzülu memetetba mapang asünung oral traditiontemji nungdaker. Arogo tenzüka otsüren aika nung oral tradition nung dang amendaka angutsü. Yisu Khrista nüsung St. Thomas India limai arua arogo tenzüksüba; Tenyar Paul aser Peter nati Rom nung arogo tenzüksüba, yamaji Khrista nüsungtem parnok taküm aser mapatem ajakji oral tradition nung amendaka lir. Tenyar Paul shititem aser nung Paul taküm indang peria dang zülua toktsü. Itemji Paul taküm atema primary aser direct evidence kulitemji lir. Oral tradition-temji shitaka asütsüa akok mesüra nisungi yanglua jembiba asütsüa akok. Otsü asoshi item oral tradition-temji tongtibang, saka tatalokba mapang teka agi zülua toktsüba aser mapa kulitem (contemporary document/evidences) mali nung aikati "hau" ta dang sür kangabo süoki ia mebilemi dang yutsür. Saka Molungyimsen arogo atemabo missionarytem-i zülü peria dang yutsüba angutsü.

Item khuretem pongdoktsü asoshi ABAMi 1981 küm Special Committee ka shimteta parnoki 1986 küm tengutetba ABAM Central Council nung agütsü, aser Mungdangi ibaji agizüka ayu. Itemji socio-political, cultural, anthropological, document aser spiritual tangatetba nungi bener arua agütsüogo. Item ajak ya lenmang balala tsütsülen nungi interpret asüba lir. Parnoki agütsüba ajakji shitak dang lir (all true/correct from their own interpretations, views and perspectives).


History tangatetba nung mongin kaket zülur E.H. Carr, John Webster aser R.G. Collingword parnok tangatetbaji: historyji tanen maka (unending, interpretations, interactions, conversations, dialogue between past and present ta ashir. Anungji Ao Naga tenem nung Khristar arogo tenzükbaji academic exercise ka ama tanen makai odaktsütsü asü tesüiba mapang ABAMi shimteta Special Committee ajanga bener aruba ABAMi agizüka aliba nungji tatem akümstü?

R.G. Collingword-i züluba nung History ya tazüokba (discipline) ka lir. Tatalokba aser tebilembatem asenok zülunüsü zülutsüba masü, saka nisung ajak nem tanü aser tarutsü putu ajak nung shisatsü tajung ngudaktsütsü, aser ajungmesotsü asoshi lir. Alima (secular) history aser arogo history tebandang balala lir. Secular history nungbo alima nung chubatem, yimsüsürtem aser nisungtemi inyaktetba, parnok nem tetushi khonang aser sentsüwangshi agüja zülubatem lir. Arogo history nungbo tatalokbatem Tsüngremer sentong aser mapa, Pa nem tetushi, khonang aser sentsüwangshi ajak agüja zülubatem lir.

(Maneni asung adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Jordan nung Arogotemi Khristmas benjung mamongtsü: Rifat Bader



Rifat Bader

November 08, 2023: Gaza nung Palestine nungertem aika asüba aser teimtemba atema aria bilemja takumbo Jordan linük nung Arogotemi Khristmas mapang benjungbentsü sentong magitsü telemtetba agiogo.

November 5 nü Jordan's Council of Churches nung lenirtemi sangdong ka ajanga, Gaza nung Palestine nungertem civilian tem timtemba atema aria bilemja Arogoi Khristmas densema benjung balala kecha mamongtsü, ta metetdaksü.

Ajisüaka Council-i Khristantem dang Khristmas mapang nung sarasadema amongtsü ayongzük.

Council-i, Khristmas bazaar, tanurtem nem sempet lema agütsüba, benjung sübotsü inokba aser scout parades kecha ayongzüka magitsü, ta metetdaksü.

"Onoki Khristmas benjung mamongtsü. Yisu asoba-Khristmas mapang chichiba tanela tsütsü rangloksü nükjidong nung onoki iba telemtetba agiogo. Gaza nungertem atema bilemja onoki iba telemtetba agi," ta putir Rifat Bader-i metetdaksü.

"Onoki tanela nung ang rangloker amongtsü; tetezü Tenla kidang tekülem sentongbo agitsü aser ken-a atentsü. Ajisüaka Tenla ki telung adenerbo benjungbentsü sentong kecha magitsü," ta Bader-isa metetdaksü.

Pai ashiba agi, par kinünger ka Yirusalem nung aliba Most Holy Rosary nungi Dominican Sister lir aser tang la Gaza nung aliba Holy Family Parish nung tenzükdar.

La den Jordan tsür ka aser Egypt tsür kati Gaza yimti nung

Khristantem aser tanga yimsü amangertem tenzükdar.

"Rosary Sisters ya Mother Teresa-i Calcutta nung tenzüka Missionaries of Charity nungi lir aser sister temi Gaza nung tasü ita nüburttem tenzükdar," ta Badar-i metetdaksü.

"Tenla kidang jenoka aliba nüburttem yaritsü atema parnoki tetsübu ajak kokteter. Parnok ya Gaza nung tenyartem lir. Gaza nung Khristantem maneni yaritsü atema Tsüngremi parnok kümzükdang ta onoki sarasademtsür," ta Badar-i metetdaksü.

Israel-i Gaza amak tenzüka sülen tang tashi nung civilian teimba sür nisung 10,000 dak tema süogo, ta Gaza Health Ministry-i metetdaksü.

United Nations-i ashiba agi, tang Gaza nung Palestine nungertem million 1.5 dak tema tesem balala nung jenshia lir. Israel sepaitemi Gaza yimti densema northern Gaza longbanger amaker.

"Gaza kübok Hayy Zeitouna district nung aliba Khristantemi Tenla ki ana- Latin Catholic Church aser Orthodox Church nung jenoktsü telemtetba agia liasü saka Orthodox Arogo Tenla kibo maakogo," ta Bader-i metetdaksü.

October 19 nü Israel sepaitemi amakdang Greek Orthodox Tenla kidang jenoka alir 18 shi asü aser 30 yirua liasü.

Southern Baptist Convention nung pastor Roger Spradlin süogo



Pastor Roger Spradlin

November 08, 2023: Pastor Roger kanga tesünep nung dang liasü. Pa kanga süngjema amozüka ao aser tang pa Ginger aser kinünger kar den külemi lir. Onoki mangyimer, ajisüaka pa kodak nung asen Kümtetdakba aser tamalen asür kinüngertem den külemi lir ta meteta onok melung süngzüker," ta kinüngertemi metetdaksü.

Pastor Spradlin-i pa kinüngtsü Virginia den tanur asem aser semchir 10 toktsür pilar. Charlotte, North Carolina nung aliba Southern Evangelical Seminary nung Tir aser Christian Post yimobilem zülur, Richard Land-i, "Spradlin ya Criswell College of Dallas, Texas nung zünga liasü. Pai kanga nendaka azüng aser pa

"Tesüiba küm ka onoki temenungratsü aika ajangshio saka timtem-a aika ajuru. Ajisüaka Tsüngremi taochi sayu aser onok sarasadem langzü, kechiyong tesüiba hopta aika

tajaba junga meteta liasü. Spradlin-i küm aika Arogo aser Khrista junga tenzükdang," ta metetdaksü.

Richard-i Spradlin'er kinüngertem den mangyim jashi lemsatepa, "Parnok tesünep nung lir ta ni amanger, kechiyong tang pa asen Kümtetdakba den külemi lir," ta ashi.

Spradlin ya 1955 küm aso aser 1977 küm Oklahoma Baptist University nung graduate asüba sülen 1983 küm Criswell College nung Biblical Studies nung master's degree angu. 2002 küm Louisville, Kentucky nung aliba Southern Baptist Theological Seminary nung pai doctor of ministry degree ngua liasü.

2010 küm nungi 2012 küm tashi pa SBC Executive Committee nung Chairman inyak, 1999-2001 nung SBTS' board of trustees nung Chairman inyak aser 1997-1999 nung California Southern Baptist Convention nung Tir inyaka liasü.

Yaküm October ita nung pa dak cancer tashidak putetba sülen taküm February ita nung pai tenzükdang wadang nungi anena liasü.

Tang Spradlin'er jabaso, Andrew-a Valley Baptist Church nung pastor inyaker.

ANOGO ABEN TSÜNGREM DEN

Bendang lima nung ken atenba

T. ken 149: 1-9

"Nenoki Kibuba sangang! Kibuba dang ken tasen ka tenang" (t.1). Kasa kenji tenla kidang dang atentsüla ta asenok tangatetba ka lir, aser idakji kecha tai mali. Ken züluri ken kaket tasen alitsü asenok dang mashir. Pai asenok dang Kibuba metetba tasen akatsü asenok dang ashir. Idangji asenoki Kibuba tenüng asangba ken tasen Kibuba dang tentettsü.

Lenten tasen ajangba shia, tenem tamajung ajangba shia, taküm nung tajangshiba shiai asenok mulungjang ken tasen zülutsütsüla. Idangji asenoki ken tasen agi Kibuba tenüng sangtettsü. Kodang asenoki timtem ka ajurudir, asenok tamang tasen inyakba angutsü aser ken tasen agi Kibuba tenüng asangtsü mapang tajung angur.

Tekong ka nung asenoki telok nung ken atentsü ken züluri ashir. Telok nung Kibuba tenüng asangba ken atandang asenok pelar. "Israeli Pa yangluba dak pelaseta lidakjang: Zion chirtem parnok chuba dak pela liang" (t.2). Kodang Tsüngrem chirtem Tsüngrem mapa asoshi tenüng sanga senteper, iba nung ajak pelateper. Pai ajangba asoshi Pa nem tenüngsang agüja ajak pelateper.

Saka ano Pai ashir, asenoki yipden nunga pelateptsüla. "Parnoki tepela agi parnok yipden manunga ken tendakjang" (t.5). Kodang asenok anisüngzüka lidir, shiranga aliba nungi taneptsü angudang ya inyaksü akok. Tang na yipden nung aser na anema mali. Ne yipden nung Kibuba sangang aser Pa külemang. Ken züluri ashir, "Parnok bang nung Tsüngrem nüngsang tulu lidakjang, aser anatsü nok parnok ket nung kintem madak mang ayangtsü aser nisungtem madak temerenshi inyaktaktsütsü" (t.6,7). Ibai rarai aor noksa ka lir. Tongpang rara nung ken atentsü.

Telok nung ken atentsü temela saka yipden nung aser tongpang rara nung temela masü. Saka asenoki tenra asenoki Kibuba sentsüwangshir, asenok aintsü. "Kibuba ajemalur takok agi tebur jungdaksür" (t.4). Asenoki Kibuba dang tenra asenok tepelaba aser temeshiba aser tali topur tajungba asütsü.

Nai Pa temeim aser taochi tejangjaba angazükdaktsütsü asoshi tajangshiba balala ajang Tsüngremi na anir. Tanü nai kechi timtem ajurudir, ibaji odang taremsük mesüra amajok tekümdaktsü. Ibaji Tsüngrem tenüng asangtsü ken tasen ka anguba südakjang.

Gaza nung pua alirtem chioktsü atema sarasadem

November 08, 2023: Hamas website nung puer oa alirtem teloki pua alirtem chioktsü atema Israel aser America nungertemi longjemer sarasadem tenzükdang.

Osangbener den jembidang Yael Bar-Shov-i, pua alirtem chioktsü atema sarasadem sentong ka tenzükdang ta Tsüngremi la den jembida liasü, ta metetdaksü.

Iba sarasadem sentong dang 'Adopt-a-Hostage-For-Prayer' ta ajar.

Interview ka nung jembidang lai, "Anogo ishika tejaklen ni amoi oa aliba nungi saaka amen, aser Kibubai kü dang 'adopt a hostage for prayer' ta ashi," ta metetdaksü.

October 7 nü Hamas kiralongrartemi Israel amakdang nisung 1,400 dak tema tepset aser nisung 240 shi puer ao.

Kidnappedfromisrael.com

website nung puer oa alirtem indang noksatem lir, aser iba nungjagi noksa ka download süa sarasademtsütsü akok, ta lai metetdaksü.

"Website nungjagi noksa ka download süa ner kidang mesüra gari nung maloka ayuba sülen Kibuba dang sarasademang, ibaji ajangba Kibubai nisungba asoshiji mapa inyaksü," ta lai ashi.

"Kidnappedforisrael.com website ya alima tesem ajaklen nüburttemi meshitetba lir. Sydney, Australia nungi tenzüka Europe nung linük yimtibatem, US nung state 30 dak tema, South America, Asia aser Africa densema Continent trok nungi temeden atema inyaker meyirjang aikati kasa nükjidong yur inyaker. Pua alirtem chioktsü atema nükjidong yur inyaker," ta laisa metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Scü

(n) tepok nungi aluba jana (faeces)

* Ki ajak nung scü kozüdak kanga junga yanglua lir.

Scülongtsü

(n) scü longer aoba takümsangnü (dung beetle)

* Scülongtsü ya kentok shiruruang mesük.

OLONG PAITEP # 6610

Grid for OLONG PAITEP # 6610 with numbers 1-18 in specific cells.

TIPIEN

- 1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S ____ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. ___ hi - (3)
16. Akümüli nungi pilar - (3)

OLONG PAITEP # 6689 TELANGZÜBA

TIPIEN :

- 3. Auya, 5. Tekoro, 7. Yong, 8. Mata,
10. Asen, 11. Anentsü, 12. Lisü,
13. Ak-ki, 15. Ajak, 17. Indang,
18. Okar.

LANGTSÜNGLEN :

- 1. Atema, 2. Komo, 3. Aong,
4. Yongsük, 6. Tsüangi, 7. Yanü,
8. Molung, 9. Tasazük, 10. Asak,
14. Kanga, 15. Apir.

NAI-A YA METETTER MA

- * Hindu tamangba yimsü ya alima nung tamanbga yimsütem rongnung tejentiba lir
* Taj Mahal ya chuba ki (palace) masü saka leper lir
* India nung tama diamonds mine süa liasü.
* India nung ajakbo vegetarian masü
* India ya alima nung English jembiba linük tulutem rongnung tanabuba lir.



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

- 1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Tepela Tasoba Anogo



Manipur: Indo-Naga yimjung ken o takaratiba nung benoktsü khanga rally ka aka

Imphal, Yimpoksüi/ Rally nung shilem agirtemi, ajemdaker Indo-Naga yimjung November 8 (Agencies): "Implement Framework asoshi inyakyim takaratiba nung Indo-Naga yimjung ken o Agreement," "We Want benoktsüba aser tanabubaji khanga Bodhbarnü Manipur Solution," aser "In Solidarity NSCN/GPRN-i anir yimjung kübok Ukhrul jila nung nisung With Collective Leadership" ta asoshi sensasemba ya Naga meyrejang aikati rally ka nung yimyim balala ayima liasü. asoshi nungeri mulungba lir ta shilem agiogo. Rally nung agütsütsü asoshi kanga nenshitsü asoshi lir. shilem agirtem ya timba tribal menomeyanger koba onok India sorkar aser Naga atema ken o tongtibangba lir. Iba nung teloktem tsüngda takhangba dak alaka tanga mezüngbuba 1964 küm ceasefire atema mulungtep aser asoshi haihaora makatsü," ta 1997 küm tanabenbuba Wung Tangkhul Region lenir mulungtepa liasü. Ajiüsüka tanü Ayung Sayai-i ashi. tashi ken o mebenteti arudar. TKS vice-president Omry Wako aser temzüing ozüing Ningshen-i ashiba agi iba rally balaka akhangba dak ay onük ana dak ajemdaker sendakba nung NSCN-IM ayongzükogo; mezüngbubaji aser India sorkar na Framework Agreement dak sendaksem bangdaka lir.

Iba rally ya Tangkhul Katamnao Saklong (TKS) students' union-i ayongzükä liasü. India sorkar aser National Socialist Council of Nagaland (NSCN-IM) na ta yimjung atema New Delhi nung sensaksema aliba pusema iba rally ayongzükä agi.

Assam: Cabinet-i cancer mozüki 10 yanglutsü atema sen crore 135 agizük

Guwahati, Yimpoksüi/ mozüki tenet yanglutsü. osangbenertem dang ashiba agi, November 8 (Agencies): Mezüngbuba shilem nung "mozükitem yangluzükba sülen Assam sorkari ashiba agi, Silchar, Guwahati, aser Diphu iba ajanga nüburtem nem mapa Mongolbarnü Cabinet senden nung sen crore 135 intoka 8000 bosa agütsütsü." ka ayongzükogo aser state mozüki asem yanglutsü aser iba Kasa mapang nung kübok tesem balala nung atema sen ya state sorkari healthcare mejungi aliba agütsütsü. jenjang ajungkettsü atema atema Assam Cancer Care Tanungba cancer mozüki council of ministers-i, "Free Foundation (ACCF) dak sen tenet ya tanabuba shilem nung Drugs and Consumables for Dhubri, Nalbari, Goalpara, Government Hospitals," kübok Golaghat, Nagaon, Sivasagar, sen crore 133 agütsütsü telemtetba agiogo. aser Tinsukia nung yanglutsü. telemtetba agiogo, kong Mezüngbuba shilem nung aser State minister for tourism süngolu nung mozükitem tanabuba shilem nung ano Jayanta Malla Baruah-i densema lir.

GOVERNMENT OF NAGALAND DIRECTORATE OF AH. & VETERINARY SERVICES NAGALAND, KOHIMA ADVERTISEMENT

Dated Kohima the Nov. 2023

NO. VET/EST/APP/222/2022-23 : In pursuance to the approval of the Government of Nagaland, vide letter NO.AHV/EST-1/2/2010/344 Dated 31st Aug. 2023 and NO.AHV/EST-1/2/2010/708 Dated 5th Oct. 2023, applications are hereby invited from indigenous inhabitant of Nagaland for filling up the posts of Driver (Group-C) against retirement vacancy under the Department of Animal Husbandry & Veterinary Services.

Table with 5 columns: SL/NO., Name of post, No. of post, Pay Matrix Level, Reservation. Rows include Driver Dte. and Driver Dist.

Terms and conditions:

- 1. Documents Required:- a) Birth Certificate b) Driving licence c) Medical fitness certificate d) Indigenous Inhabitant/ Scheduled Tribe/ Aadhar. e) 2 Nos. of recent Passport size photos
2. An amount of Rs.200/- shall be charged as Application/Exam Fee.
3. The candidatesshould not be less than 18 years or more than 35 years of age.
4. The application should be addressed to Director of AH & Veterinary Services Kohima 797001.
5. Last date of receipt applications shall be 16th November 2023
6. Submission of incomplete documents shall be summarily rejected.
7. Admit card shall be issued on 22nd November 2023.
8. Interview shall be conducted on 23rd November 2023.

SD/-DR. NSANTHUNG EZUNG DIRECTOR, AH.& VETERINARY SERVICES NAGALAND, KOHIMA.

GOVERNMENT OF NAGALAND STATE COUNCIL OF EDUCATIONAL RESEARCH & TRAINING NAGALAND: KOHIMA

NO.SCERT/NHS/TXB/01/2020/ Dated: Kohima, the thNovember 2023

NOTIFICATION

This is for the general information of all concerned thatSCERT, Nagaland in keeping with the Govt. notificationNo. DSE/ESTT/LANG/1-56/2015/368 dated the 24th April 2018, will facilitate the procurement ofNagaland Heritage Studies Textbooks Classes 1-8 and Nagaland Heritage Studies Textbooks (Alternative English) Classes 5-8 for all private schools for the Academic year 2024.

Henceforth, the private schools willing to use the Nagaland Heritage Studies textbook should place their requirements through SCERT, the State's Academic Authority and not directly through the Publisher on or before 30th November, 2023.

Contact no: +918014893515

(KEVIRALE-U KERHUO) Director SCERT, Nagaland, Kohima.

Bangladesh garment factory nung inyaker taa temloktsüba nung temolung masür

Dhaka, Yimpoksüi/Nov. 08 (Agencies): Bangladesh nung ketdangsür temi longkak aita aliba garment factory nung inyaker indang itasen tasen sangdonga ita shia taa tajemba agi sen \$75 aliba shilem 56 temlokja sen \$113 kumtsü, saka iba telemtetba ya mapa inyaker telok kari magizük aser tali ajem ta ashir.

Factory kibur aser yanggi inyakerkem densema sorkari tentetsüba wage board senden ka amenba sülen State Minister for Labour and Employment Monnujan Sufian-i iba telemtetba ya Mongulbarnü sangdonga liasü. Iba pay structure tasenba ya December 1 nungi amshitsü ta lai ashi.

Bangladesh kübok industry tulu aliba tesem aser linük yimtiba Dhaka nung taa dak sendakba longkak hopta aika aita aruba sülen iba telemtetba ya agir alitsü. (Maneni tapak 8 nung...)

ZION HIGHER SECONDARY SCHOOL TZUDIKONG

MOKOKCHUNG, NAGALAND

TEACHERS REQUIRED

- 1) Applications are invited from suitable Male/Female candidates for appointment of Pol. Sc, Education, History and English teacher to teach in Zion Higher Secondary School Tzudikong for the next academic session.

Requirements:

a.	Political Science	M.A (Pol Sc) & B.Ed preferably with teaching experience
b.	Education	M.A (Education) & B.Ed preferably with teaching experience
c.	History	M.A (History) & B.Ed preferably with teaching experience.
d.	English	B.A (Eng) & B.Ed preferably with teaching experience.

- 2) Written applications alongside CVs, and photo copy of all the relevant documents should be submitted to the School E-mail or Principal WhatsApp. Only shortlisted candidates will be called for interview and demo class.

For submission of documents and further details please feel free to contact the following:

- a. Principal : 8787838974 (WhatsApp)
b. Chairman : 8787836210
c. E-mail : zionschooltzudikong@gmail.com

LAND FOR SALE

Behind Sovima Cricket Stadium

RATE Rs. 490/- per Sq.ft.

ANY SIZE AVAILABLE

- Price Negotiable -

CONTACT
8974020568

PURANA BAZAR 'B' AO BAPTIST AROGO

Küm 25 Jubilee mung sentong

1998 - 2023



OMEN : *"Niji Sangtongdi"*

ANOGO : 11th - 12th November 2023

Tongti O Jembir

Rev. Dr. Mar Pongener

Executive Secretary, ABAM, Impur

Tezülur

1. Mr. Rishilong Aier, Clerk cum Cashier
2. Mrs. Rongsentula Jamir

Küm 25 Jubilee Nungshi Lapoktsür

Rev. Dr. Mar Pongener

Executive Secretary, ABAM, Impur

Mapang : 10:00 A.M.

Anogo : 12th November 2023

11th NOVEMBER 2023

HONIBAR ANUNG SENTEP SENTONG

Mapang : 04:00 P.M

Jubilee sentong lapok

Youth Ministry

1. Sentong lenir : Miss Bendangmenla Ozüküm
2. Lai zünger sarasademtsü : Mr. Kilang Longkümer, Pastor Nükmen Baptist Arogo
3. Telok ken : *"Jubilee Küm"*
4. Asür bilemtetba : Rev. S. Lanu, Pastor
5. Tarur pela agizükba : Mrs. Tongpangla, Deacon
6. Tepela 0 : (a) Mr. O. Temjen
(b) Mr. Animbe, Pastor Nkio 'B' BC
7. Küm 25 Jubilee otsü kakat sayaba
8. Temeja ken : Jubilee Choir
9. Tsüngrem O
10. Tatem ken : *"Kü linük Ne Meyong"*
11. Tatem sarasadem : Rev. Yanger, Pastor Laimen Baptist Arogo

12th NOVEMBER 2023

DEOBAR ANEPDANG SENTEP SENTONG

Mapang : 11:00 A.M

1. Sentong lenir : Mrs. Anungla, APW
2. Lai zünger sarasademtsü : Mr. Temsü Jamir, Pastor Aoyimti Baptist Arago
3. Telok ken : *"Tsüngrem Dang Sentsüwangshi"*
4. Tepela 0 : (a) Mr. Chubazüngba, Tir, AST, PB' B'
(b) Mr. R. Temjen
5. Jubilee tenla bendentsü :
6. Temeja ken : Jubilee Choir
7. Tsüngrem O :
8. Jubilee pangzüng :
9. Molungnen 0 : Mr. L. Temjen Lkr.
Convenor Silver Jubilee
Planning Cum Fund Raising
Committee
10. Tepela Sangtongang : Miss Sentila Jamir
11. Tenzükba kuli kakat agütsüba mapang
12. Tatem ken : *"Sentsüwangshi Nüji"*
13. Jubilee shipang : Christian Education Ministry
14. Tatem sarasadem : Mr. Chubatemjen Associate
Pastor Ao Baptist Arogo
Padumpukhuri

Israel mesüra Hamas-i Gaza nung yimsü asütsü US-i memolunger: Blinken

Tokyo, Yimpoksüi/Nov. 08 minister tem senden ka (Agencies): Rara atemba Bodhbarnü amenba sülen sülen Gaza nung Israel-ia yimsü osangbener den jembidang, mesütettsü mesüra Hamas-ia mapang talangka yimjung nung yimsü mesütettsü, ta US alitsü asoshi Blinken-i "key Secretary of State Antony elements" kar agütsü aser US Blinken-i White House ya rara sülen tensa indang jembidang tangatetba nenshia ashi. tenzüksü janrar amai ajitet.

Japan nung G7 foreign (Maneni tapak 8 nung...)

**No more delays
in loan processing...**

**Provide details of your
financial asset information
in real time.**

Register with an
Account Aggregator,
today!

- Share your financial information through an Account Aggregator in a secured manner as it does not see or store your financial information
- Account Aggregators will share information with lending banks and NBFCs only on receiving clear instructions from you
- Registering on and using the Account Aggregator Network is easy; saves your time and money



For more details,
visit <https://rbikehtahai.rbi.org.in/aa>
For feedback,
write to rbikehtahai@rbi.org.in



Issued in public interest by
भारतीय रिज़र्व बैंक
RESERVE BANK OF INDIA
www.rbi.org.in

ODI rankings: Shubman Gill No. 1 asayar kumogo



New Delhi, Yimpoksüi/November 8 (Agencies): Bodhbarnü sayaba ICC Men's ODI Batting Rankings nung India nung opener Shubman Gill-i Pakistan captain Babar Babar ajateta temaba jenjangi tuogo.

ICC Men's Cricket World Cup nung kanga junga asayaba sülen Gill ya tang temaba jenjangi tuogo. Pa ya India nung batsmen tem rongnung ODI nung No 1 akumba asayar pezububa lir. India nung rongnung Sachin Tendulkar, MS Dhoni, aser Virat Kohli nungeri ODI asaya nung batsmen tem rongnung temaba jenjangi tongteta lir.

Gill-i tanga asaya aliba World Cup nung Sri Lanka den asayaba mapang run 92 yanglu aser South

Africa den asayaba mapang run 23 yanglu aser tanga tashi nung asaya trok nung pai run 219 yanglu lir.

Kasa mapang nung Babar-i tang asaya aliba World Cup nung asaya ti nung run 282 dang yanglu lir aser pai rating point trok agi Gill memenepe tanabuba jenjang nung lir. Pa kum ana dak tema ODI batsmen tem rongnung temaba jenjang nung aliba sülen tang tanabuba jenjangi aluogo.

India nung rongnungisa taoba captain Virat Kohli ODI rankings nung tang pezububai tuogo.

Gill tang mezungbuba pa indang career nung temaba jenjangi tongteta aser kasa mapang nung Kohli-a jenjangi asem tejkadangi tua pezububa

nung lir.

Kohli tang tasembuba jenjang nung aliba South Africa nung opener Quinton de Kock rating point ka agi dang memenepe lir. Pai iba World Cup nung tang tashi nung run 543 yanglu lir.

India nung rongnungisa Shreyas Iyer-a jenjang 17 tejkadangi tua tang 18buba nung lir. Pakistan nung opener Fakhar Zaman-a jenjang asem tejkadangi tua tang 11buba nung lir aser Afghanistan nung asayar Ibrahim Zadran-a jenjang trok tejkadangi tua 12buba tongteta.

Bowler tem rongnung India nung fast bowler Mohammed Siraj ICC ODI bowling rankings nung temaba jenjangi tuogo. World Cup nung kanga junga asayaba sülen pa tang temaba jenjangi tuogo.

WC nung asaya ti nung Siraj-i wicket 10 agia lir aser pa indang economy rate of 5.23 lir. Pai Souhy Africa nung spinner Keshav Maharaj ajatetogo.

India nung bowler tem rongnungi ano Jasprit Bumrah-a jenjang asem tejkadangi tua tang tibuba nung lir aser Mohammed Shami jenjang tenet tejkadangi tua tang 10buba nung lir.

Al-Ittihad coach Nuno Espirito Santo mapa nungi anentsü



Yimpoksüi/November 8, 2023 (Agencies): Al Ittihad-i taoba Tottenham Hotspur manager Nuno Espirito Santo mapa nungi anentsüogo, ta Saudi champions yagi sangdong ka ajanga metetdaksü. Nuno kübok team junga masayateti aruba sülen tang pa mapa nungi anentsüogo.

Saudi Pro League nung Al Ittihad pur junga masayateti aruba sülen Nuno ya pressure nung liasü aser Hombarnü Asian Champions League nung Iraq indang Air Force Club 2-0 agi makokba sülen pa mapa nungi anentsü.

Nuno shiba Wolverhampton Wanderers coach ama 2017 nungi 2021 tashi kanga takok ngua inyakogo, pa lenisüba nung Jeddah nung amendaker aliba Al Ittihad club ya taoba kum July ita nungi asaya liasü.

Taoba Porto coach yagi Al

Ittihad pur taoba season takok dangi ani, saka pa striker Karim Benzema den meputepba indang osang angazüka liasü. Benzema ya takum June ita iba club nung dena liasü.

"Club-i Portuguese coach Nuno Santo den tenangzüktepba yanglur aliba tembangba sangdongogo," ta Al Ittihad-i X sabang ajanga metetdaksü.

"Pa kübok team inyakshiba kanga junga asadanga sülen iba telemteba agiogo," ta kasa sangdong ajanga metetdaksü.

Nuno melena coach ka meshim tashi assistant coach Hassan Khalifa-i khen atema coach mapa bena atatsü, ta club-isa metetdaksü.

Nuno ya 2021 kum tom nung Tottenham manager asütsü shim saka ita pezü dang lir pa mapa nungi anenja liasü.

India tetsür hockey team 6bubai tuogo

Yimpoksüi/November 8, 2023 (Agencies): Tawa tembangba Asian Champions Trophy aser Hangzhou Asian Games nung kanga junga asayaba sülen India tetsür team world rankings nung 6bubai tuogo.

India team-i rating point 2368.83 nguteta parnok England jakdang trokbuba nung lir.

Asian Games masaya tsungda India tetsür team tibuba nung liasü saka iba asayamung nung bronze medal anguba den Asian Champions Trophy akokba sülen

parnok tang trokbubai tuogo, koba team-i tang tashi nung ajangzükter aliba jenjang rongnung tajungtiba lir.

Netherlands team maneni temaba jenjang nung lir. Parnoki rating point 3422.40 ngua lir. Netherlands sülen tangbuba jenjang nung Australia (2817.73) aser tasembuba jenjang nung Argentina (2766.90) lir.

India jakdang aliba team tem rongnung pezububa nung Belgium (2608.77) aser pongububa nung Germany

(2573.72) lir.

January 13 nungi 19 tashi Ranchi nung asayatsü aliba FIH Hockey Olympic Qualifiers atema renemshia aliba mapang world ranking jung tejkadangi atuba ya team asoshi tajungshiba ka asütsü.

Iba asayamung nung India team Paris Olympics atema qualify asütsü asoshi Germany, New Zealand, Japan, Chile, United States, Italy aser Czech Republic nung amala team den asayatsü.

Bangladesh garment factory...

(Tapak 7 nungi...)

Bangladesh Garment Manufacturers and Exporters Association ajanga monthly minimum wage shilem 25 temlokja sen \$90 agütsüsü ashiba sülen longkak aitba ya tenzük. Tesüsa minimum wage temloksüba ya 2018 nung sangdonga liasü.

Garment factory nung inyaker nisung meyirijang aika adenshia monthly minimum wage sen \$208 khanga yimtung nung longkak aita ary. Factory pezü nung mi senloksü aser azüdokshi nung mapa inyaker ana tepset, aser parnoki highway mokdanga police den raratepa liasü.

Taa timba kumsüba sangdongtsü lia tensa tamajungba kuma Dhaka tezülen Mongulbarnü bus ka nung mi senloksüba mapang police temi mapa inyaker meyirijang aika adenshia alidak tear gas khaloktsü.

Gazipur yimti nung mapa inyaker 6,000 shi parnok mapa inyakba tesem nungi ayazüka oa longkak aitba ajanga mepetmesü

tenzük ta police temi ashir.

"Parnoki bus ka nung mi senloksü. Parnok senshitsu asoshi onoki tear gas khaloktsü," ta Gazipur industrial police unit tekolakba Sarwar Alam-i osangbener dang ashir.

Western brands tulu aika asoshi aben-süoshi yangluba garment factory 600 shi taoba hopta timtem ajurua liasü ta police-i ashir.

Parnoki sen timba akhangba asadangtsü asoshi sorkar dang factory kibur, union lenir aser ketdangsür temi panel ka kumtetsü ajungshia liasü.

Osettsüset nung jenjang shilem 9.5 agi timba kumer alidang pei nungdak peritsü asoshi mapang tali mapa inyaktsüsa akumer ta mapa inyaker temi ashir.

"Osettsüset aser ki para nung sen kanga sashia temloker alidang itasen tuja aliba yagi meperir. Onok takum alitsü asoshi inyaker, saka onok nungdak kecha meperir," ta garment mapa inyaker kati ashir.

Sen mechi-menu

temloksüba atema kanga jashir, ta Bangladesh Garment and Industrial Workers Federation tir Kalpona Akter-i ashir.

Anogoshi nungdakba oset nung jenjang tujen atuba ajanga mapa inyakertem tim atemer. Ibai kanga tezüdangtsüka lir. Onoki ya magizükter, ta Akter-i ashir.

Alima nung garment-production linük tulutibaji China lir aser iba sülen Bangladesh ya lir, kong factory 3,500 jungnüa nung mapa inyaker million pezü shi lir, aser itemji timba tetsürtem lir, ta manufacturers' association ajanga ashir.

Bendang limai garment products yokba nung kum shia Bangladesh sen billion \$55 shi ajangzükter, koba gross domestic product shilem 16 jungnüa lir. Parnoki Levi's, Zara aser H&M amala nem aben-süoshi agütsür aser itemji timba United States aser Europe leni aor.

Parnoki Japan, China aser India ama market tasen bushiba mapang lir.

Israel mesüra Hamas-i... (Tapak 7 nungi...)

Gaza nungi Palestine nungertem tashiyim amshia meporokshidaksütsü, tanga masütsü aser rara sülena masütsü, kiralongra mesüra azüdokshi lendong atema Gaza ya sapang ama mamshitsu, rara tembangba sülen Gaza tanaben amokbangba malitsü, ta pai ashi.

US ketdangsür-isa Gaza mokdangtsü mesüra Gaza litsü ajemdaksütsü memerangtsü ashi.

Rara sülen Israel-i Gaza nung security ketdangsütsü akok, ta Israel Ato Kilonser Benjamin Netanyahu-i Hombarnü shia liasü.

Ajisüaka US ketdangsür temi tasunggi ashiba agi, Israel sepaitemi tanaben amokbangtsü Tir Joe Biden-i memolunger.

Gaza ya Hamas-ia yimsü masütsüla ta Washington tangatetba lir, ta Blinken-i nenshia ashir. Tang iba tesem ya Hamas kübok lir.

"Ibaji October 7 lendong tanaben meshir asütsü," ta Hamas teloki Israel nung amakba athishia pai ashir. Iba lendong tayang kepzüka Israel-i Gaza nung bomb poklokja

amakdang Palestinian territory nung nisung 10,000 dak tema tepsetogo.

"Rara tembangba sülen transition period nungdaksü... tanaben amokbangba onoki mangur aser Israel lenirtemia Gaza tanaben amokbangtsü tebilemba mali ta ni angashiogo," ta pai ashi.

Gaza Strip yimsü asüba nung Hamas shilem malitsü ta US-i sangdongba langzüa Mongulbarnü Hamas-i iba tesem nung yimsü asütsü ya Palestine nung tebilemstü lir, ta ashi.

"Gaza mesüra ozü li yimsü asütsü ya Palestine nung mapa lir, aser kecha tashi agia asangsang memelenshitetsü mesüra pari molungba meinyaktsü," ta Hamas odongtar Abdul-Latif al-Qanou-i ashir.

"Hamas ya national liberation movement lir aser Palestine nung ki ajak nung alir. Hamas ya ozü nürburtem indang tongtipang shilem lir aser ozüng aser yimsü ajak nung aliba ama tashiyim amshia amokbangtsü merangba anema nokdaksü tashi lir," ta al-Qanou-i ashir.

BILEMDANGANG

"Tajung tamajung ajak teti asoshibo masü."